

EPESASA

Poleme Epesasa wambu pepa pyao maiyamo renge mupwa suu pyao leyamo doko rombo 1 liti 10 pyasi palamo. Yuu gii pyaka separamo dokopa Anatumi banya wasisi peparae yake pandape isa pandape nyuo mendakyapala dokona Koraisa baa kyawa ingyuo kararaja lao suu piyamuli pira. Mende wambu peparae role pyao mendakinya kararami lao Anatumi rapa rapa piyamo renge doko Anatunya wambu Yesu Koraisa keta mendakinya karapala lasaka pirami lao Poleme laokondali piya.

Wambo piyamo dorena pyao dokopa renge angi doko lasaka pyuo lao, Rakane Anatumi nakama rombo palyuo nyiyamopa Yesunya ranjama dokome koo nyuo kame sakamiya. Dokopa Anatumi leyamuli pyuo kaeya nao banya wambu dupwa renge keyange nyerami dokona Imambu Poo Pyasi roo ingyuo wambo jiya, dopa lao piya. Enakana piyamo dorena pyao dokopa yaka larami wambu dupwa nakama Yesu Koraisa keta mendakyapala karaminyi doko nakamana pii lao renge rambo lao piso karo dokopa lasaka pirami ingilyamo lao piya.

Kongwalu lapo palyuo Anatunya wambu dupwa Yesu Koraisa keta mendakyapala karaminyi doko Poleme lasaka piya. Lasaka pyuo dokopa Elyambu Pingi doko yongo dopale. Yongo dokona Koraisa baa kyawa karamo. Dee mende opetae Elyambu Pingi doko anda dopale. Anda dokona Koraisa baa anda pinginya ingyuo karamo. Deeko Elyambu Pingi baa enda dopale. Koraisa baa banya akali ingyuo karamo, Poleme lao piya.

Anatumi Yesu Koraisa keta banya mona keyange palyuo ipingi renge doko lasaka piyaja lao pii piyamo dokona ipingi renge dokome siki nyepala renge kuiyuo sinya lao pii renge dokona rungi rungi pyao pyao reteya. Yesu Koraisa baa poo pyasi karo mona keyange palyuo ipyuo karo wambu mona reto nakamana lao kumapala koo dupwa kame sakamingi dusipa isa susa dopale ingyuo Poleme mana pii wakale lapo konda pyuo lamaiya.

Buku Dakena Pii Palamo Dusipa

1. Pii kanda soo leya dupwa *1:1-2*
2. Yesu Koraisamoo Elyambu Pingi wambu dupwape *1:3-3:21*
3. Koraisa keta enenge ingyuo karalapape *4:1-6:20*
4. Pii lao oto leya *6:21-24*

Poleme Yako Lao Leya

1 ¹Anatumi masiyamuli pyuo namba Pole Koraisa Yesunya aposele ingyuo karo. Anatumya yapasi wambu Koraisa Yesunya lao suu pyao minyuo Epesasa karaminyi dupwa keta pepa dake pyao peyakalyo.

²Namwana Rakane Anatu Kamongo Yesu Koraisapana mona keyange palyuo ipingi rengepe mona kyuuo lao singi rengepe nakama keta sinyua lao leto.

Anatumi Koraisa Keta Namwa Elyape Jiya Doko

³Kamongo Yesu Koraisana Rakange Anatu ketae pyambuo karena. Baame namwa yake panda dorena imambunya yulu keyange wakasa palenge dupwa Koraisa keta namwa jiya. ⁴Anatumi yuu muu dupwa ene wasapa nao karo dokopa Koraisa role pyao kararama lao namwa rombo palyiya. Dokome namwa koo mende pali nao yapasi inginyi pyambwara ingilyamo. Anatumi renge kuiyuo mona reto karapala ⁵Yesu Koraisa keta namwa banya rangena ikinyingi ingyuo manjo nyeronjo lao mona nyepala suu pyao kaeyapya.

⁶Anatumi mona keyange palyapala banya Ikinyingi mona retenge doko namwa mee jiya dokona lao banya kingi lakandamana.

⁷⁻⁸Koraisana ranjama kulimbuo peyamo dokome namwa kiiramo nyisi karamano. Karamwanopa baa keta namwana koo dupwa kame sakapa pingi. Banya mona keyange palyuo ipingi doko andeyamosa namwa keta kakana pyuo jiya. ⁹Baa singi dokome sepala soo giso pyuo karengge dokome Koraisa keta mende piru lao masiyamuli pyuo renge yalu pisi doko nyuo namwa keta nolako piya. ¹⁰Yuu gii pyaka separamo dokopa Anatumi banya wasisi peparae yake pandape isa pandape nyuo mendakyapala dokona Koraisa baa kyawa ingyuo kararaŋa lao suu piyamuli pyuo pira.

¹¹Anatumi mende piru lao masapala yulu peparae kaeya nao pingi. Dokome baa kanda soo dokopa suu piyamuli pyuo namwa Koraisapa pako banya wambu ingyuo kararama lao rombo palyiya dokona ingyuo pelyamo. ¹²Koraisame namba keta mende pyakara doko wambo soo nyepayama dupwame Anatumya yanga paupau lenge renge doko ketae pyambuo karapengele ingilyamo.

¹³Dokona palyuo nakama opetae pii angi waili pii keyange doko soo manjipala Koraisa kapa ingingi lao suu piyami dokona pyuo nyisi karaminyi. Dokopa Anatumi nakama banyara lao Imambu Poo Pyasi dokome mumbwa palyili lao jeronya leyamuli pyuo nakama keta maralyiya. ¹⁴Anatumi leyamuli pyuo kaeya nao banya wambu dupwa renge keyange nyerami dokona Imambu Poo Pyasi roo ingyuo wambo jiya. Dokona ingyuo namwa kiiramo nyisi kararama doko soo gisapala Anatumya yanga paupau lenge renge doko lakandamanale.

Polena Ateŋa Doko

¹⁵Nakama Kamongo Yesu kapa ingingi lao suu pyapala Anatumya wambu yapasi yango mona reto karaminyi doko sepala ¹⁶nambame

ateja lao dokopa kaeya nao ange lao karo. ¹⁷Namwana Kamongo Yesu Koraisana Rakane Anatu neta renge ingyuo karenge dokome Imambu Poo Pyasi jakana lao ateja lakalyo. Imambu Poo Pyasi nakama keta jeramo dokome nakama mona paliramopa Anatu dokona angingyuo soo nyerami. ¹⁸Nambame ateja lao dokopa imambunya lenge pendakae lapala Anatumya yanga paupau lasi dupwa kandamili lao lakalyo. Baame banya wambu keta keyange pyakaronu renge dupwa kandarami lao kee lao sukusa ipupwape leya. ¹⁹Banya porainya renge yapasi doko namwa Anatu kapa ingingi lao suu pyao karenge dupwa keta palena lao ateja lakalyo. Porainya renge wakasa pyuo kareyamo dokomeyoko ²⁰Koraisa kumasi siyamo dokopa minyalyuo lete nyepala yake panda dokona banya kingi rolaerename pisiya. ²¹Dokopa mupwa dupwape ketae karamo dupwape poraingi dupwape kamongonge dupwape kingi ketae palenge dupwa peparaena Koraisa baa mupwa ingyuo petena lao piya. Yuu gii dusipana iki daako, yuu gii ene eparamo doko opetaenako. ²²Baa karamo dokona lungwa lungwarename peparae karena lao, dee Elyambu Pinginya kyawa ingyuo karena leya. ²³Elyambu Pingi doko Koraisa banya yongo dopale. Baa dokona renge kuiyuo piso nyimbu penge. Dopako pyuo peparae keta kapa kapa pyuo palenge.

Kumasi Kyuku Renge Kareyaminypa Lete Wai Pyao Nyiya Doko

2 ¹Nakama wamba yulu koo wakale wakale dupwa pyuo kareyaminypa kumasi ingyuo kareyami. ²Nakama isa wambunya yulu koo pinginyili pyuo imambu koo dupwana kamongo doko warombo soo kareyami. Kamongo doko wambu Anatu kando kamba lenge dupwana monarename yulu koo pyuo karamo doko. ³Namwa opetae dopako pyuo karo yanengena pyuwaneme kumuo karapala namwana suu pingipi yongo dokomepe koo dokona pyao ralinyi pyambuyamopa dolapona rape rape lao pyuo kareyama. Namwape doloma peparaepe mendakinya peyara Anatumi lara ingiya.

⁴⁻⁵Lara ingingi doko namwa yulu koo pipala dokopa kumasi ingyuo kareyamanopape Anatumi namwa ama sakapala mona reto kareyamo dokome namwa Koraisa keta lete wai pyao nyiya. Anatumi mona keyange palyuo ipyuo karenge dokome lete wai pyao nyiyapya. ⁶Baame namwa Koraisapa role pyao minyalyuo nyepala yake panda dorena Koraisa Yesunya arapu dokona baapa pisiya. ⁷Dokopa yuu ene eparamo gii dupwana baa anjiki pipala banya mona keyange palyuo ipingi renge kamame wakasa doko Koraisa Yesu keta panara. ⁸Anatumya mona keyange palyuo ipingi renge dokome nakama baa kapa ingingi lao suu piyami dokome pyuo nyisi karaminyi. Nakama rangena yulunde daa. Anatumi emboneme pyuo nyiya. ⁹Wambunya yulu pimi dokome epelyande daako. Dopa pilyamo dokona mendeme range lakandapengele

ingya nalyamo. ¹⁰Anatu range namwa wasiya. Namwa Koraisa Yesupa pako yulu keyange pirami lao wasiya. Namwa kata rolae dupwana papyuo kararama dupwa Anatumi wamba rapa rapa piya.

Rara Paka Lakisi Kareyamanopa Koraisame Nyuo Komondeya Doko

¹¹Nakamana yanenge ketae dokome Juu daa rara wakale ingyuo kareyami. Yanenge awali lao kalomenge dupwame nakama yanenge awali lao kaloma nange lenge kandale. (Yulu doko kingimi iki yanenge dokona kalomenge.) Nakama wambo apiyakale ingyuo kareyami doko kame see nalapape. ¹²Wamba dokopa nakama Koraisapa liti pyuo karo, Isaraele rara dokopa wakale ingyuo kareyami. Anatumi Isaraele keta keyange mairunya lao pii lanyi sereyamo dokona nakama kamenge ambe ambe kareyami. Isa panda dokona Anatu soo nyii napala dokopa mende pyakarandelyamo lao mona kare kare kara nayami. ¹³Dopa pyuo nanesa kareyaminyipape epapu nakama Koraisa Yesu keta banya ranjama isa peyamo dokome nakama banya arapunya karaminyi. ¹⁴Baa namwana manda rao nyingi ingyuo karamo dokona banya rangena yongo dokome namwa Juu rara dee nakama rara wakale dupwape nyuo pakapala imbu singi kame lili piru kareyamo doko nyuo lalyinyi isa nembeya. ¹⁵Juu wambunya Lowa dupwape mawa pii dupwape waso karengi dupwape peparae mee ingyinyi nembeya. Nembapala rara paka lakisi siyamo doko kaepala baa keta nyuo komondapala rara enenge mendakinya ingyuo manda rao karena lao piya. ¹⁶Koraisame isa mamandona kumuyamo dokome yanda pii lao rambu nyepala namwa nyuo mendakyapala Anatu kareyamo dokona dee lanyiya. ¹⁷Baame Anatupa Juu wambupi Juu daa rara wakalepe koto nyepala mona mendare palyingi waili pii keyange doko boo pyao lamaiya. ¹⁸Koraisa yulu andake piyamo dokona namwa rara laparae Imambu Poo Pyasi keta Rakange Anatu dokona repeta eparama.

¹⁹Dokona lao nakama epapu menge upunyili ingyuo kara napala Anatunya wambu yapasi dupwa pipya mendare ingyapyamopa Anatunya ree palu ingyuo karaminyi. ²⁰Anda doko aposele akalipi poropeta akalipi dupwa andana renge kuingi isa dupwa ingyuo karaminyipa pisi karamo. Koraisa Yesu baame anda pinginya ingyaro karamo. ²¹Anda kimbu soo pisi dokona baame simuisa ingyuo minyaro karamo. Doko Kamongopa pako karo misi anda yapasi ingyuo andelyamo. ²²Nakama opetae Koraisa keta kimbu silya sana pyuo pisi karaminyi. Anda pisi doko Anatu Imambu dokopa paleta karengi.

Poleme Rara Wakale Dupwana Nyisiya Doko

3 ¹Dokona lao namba Pole nakama Juu daa rara wakale dupwana lao Koraisa Yesunya anjisi akali ingyuo karo. ²Anatu mona keyange

palyuo ipyapala nambame nakama nyisareŋe lao yulu andake namba keta jiyamo doko siyami lao suu pilyu. ³Yalu pyuo palenge renge andake doko namba keta paneyamo siyu doko, (wambo pepana muu pyuo piyu kande. ⁴Pii pyasi doko yaka laparaminyi dokopa namba Koraisana yalu pingi renge doko kokorename kandeelyamo lao separami.) ⁵Doko wambu kyawa ingyuo kareyami dupwame soo kara nayami doko epapuli aposele yapasi dupwape poropeta akali dupwape banya Imambumi lamaiyuo panapyamo simi. ⁶Yalu pisi renge epapu panyamo doko, Juu daa rara wakale dupwa waili pii keyange sepala Anatumya keyange dupwa Juu wambu pipya kapa kapa pyuo nyerami. Nakama namwapa yongo mendaki ingyapala Anatumi Koraisa Yesu keta keyange jeronjo leyamo dupwa mokwa soo nyerami.

⁷Anatu mona keyange palyuo ipyapala banya porai renge namba mee jiyamo dokopa namba waili pii minyingi akali ingiya. ⁸Anatumya wambu yapasi menge dupwa peparaena namba kamame isale ingyuo karapunupape Koraisana kamongonge bange kapa pyuo soo nyii naramili dupwa namba keta epeya. Doko Juu daa rara wakale dupwa mana lamaiyuo karapenge dokona lao jiya. ⁹Anatu baa bange peparae wasiya dokome ama kai wamba mende piru lao suu pyapala yambe piya doko namba lao panaronopa wambu peparae serami. ¹⁰Dokona ingyuo Anatumya soo gisinginya renge peparae Elyambu Pingi keta lasaka piramopa yake dorena porai pi mupwa dupwapeme soo nyerami. ¹¹Anatumi wambo mende pironya lao suu pyao karengenyili pyuo namwana Kamongo Koraisa Yesu keta pipiya. ¹²Yesu kapa ingingi lao suu pyao baa keta pyamalyisi karo dokopa Anatu karamo dokona eja nembo mee kapa parama doko silyamano. ¹³Dokona ingyuo nambame nakamana lao randa nao karo dokona mona nemba nalapape. Nakama kapa palirami dokona lao randa koo nao karo.

Koraisana Mona Retenge Dokona Makande Pyuo Letamo

¹⁴Dokona ingyuo Rakange lao mona kando kingi lao karo. ¹⁵Baa keta piso yake panda isa pandape ree palu peparaena kingi lasi dupwa epeya. ¹⁶Kamongo Anatumya yanga paupau lenge renge jingi ingyuo lyuo karamo doko Imambu keta epo nakama maralyapala mona andarena porainyi pyambunya lao atenja lakalyo. ¹⁷Anatu kapa ingingi lao suu piyami dokona Koraisa nakamana monarena palyuo yuuli andale lena. Nakamame mona retenge renge dokona pingi pyapala porai ingyaramo kararami. ¹⁸Koraisana mona rentengena makande doko kamame andake dokome,

Yuu nanesa pao oto ruŋu paŋu lamo laope
 yuu ulu pao lepo pyuo lamo laope
 yuu ono komba ayanda pao lamo laope

nakama Anatumya wambu peparae dupwamoo pipya,
kando simili yaka lao aterja lakalyo.

¹⁹Kinyi Yesunya mona retenge renge wakasa isa wambumi soo ota paa nange doko soo nyeraminyi dokopa Anatu dokona mona retenge renge palyuo simbuo pelyamo doko makande minyuo nakama keta palyuo simbwara.

²⁰Anatumi banya porai renge namwa keta silyamo dokome suu pyarama dupwape jinya larama dupwape kama konda pyuo yamarangunyi nembo jingi. ²¹Wambu wambowanape enakana dupwamepe Elyambu Pingi ketape Koraisa Yesu ketape Anatumya kingi doko ketae pyambuo puu parami.

Elyambu Pingi Doko Koraisana Yongo Mendaki Ingyuo Pelyamo

4 ¹Namba Kamongona kingi reke lao puu maisi akali ingyuo karo dokome Anatu nakama kee leyamo dokona suu pyao keyange pyuo karalapape lao poraiyuo leto. ²Nakama pau lao anjiki pyuo wambu yango kando waiya lao imbu singi nyii napala kenda jerami dupwa nyuo sakamyuo mona reto karalapa. ³Imambumi nakama mona mendare palyingi dokome nakama mendakinya ingyuo anjala anjala paramopa yalya kando kararama lao poraiyuo suu pyao karalapape. ⁴Yongo mendaki dokako iki. Dee Imambu mendaki dokako. Anatumi nakama kyakale leyamo dokona keyange mende pyakara lao mona kare kare karaminyi doko renge mendakiko. ⁵Kamongo mendakiko, Anatu kapa ingingi lao suu pingi renge mendakiko, bapitisimo mendakiko. ⁶Namwa pepararena Rakange Anatu mendakiko, baa pepararena nyilyingi ingyuo kareng. Pepararena kapa kapa pyuo pingi dee namwa peparae keta palengeko.

⁷Koraisa keta elyape dupwa epeyamopa Anatumi manda manjo nyeramanuli pyuo mokwa soo jiya. ⁸Dokona lao pii mende pyasi palamo.

Baa pulyuo pao dokopa
anamasi minyuo waiku nyiyamo dupwa

lanyuo papala wambu keta mora petenge renge lapo mee maiya.

⁹Baa pulyuo peyana lao pii palamo doko apa letase? Baa lupyuo yuu donorename opetaeko peyana letamo. ¹⁰Baa lupyuo peyamo dokoko pao yake ketae ama dulurename pepararena pawiyalana peya. ¹¹Baa mora petenge renge joo kareng dokome, lapo aposele inginyi pyambuo, lapo poropeta ingyuo, lapo waili pii minyingi ingyuo, lapo rapu pingi ingyuo, dee lapo mana lenge ingyuo pyambuo piya. ¹²Dokome Anatumya yapasi wambu dupwa mondo lanyi pyambuo dokopa Kurisene yulu pirami dokome Koraisana yongo dokona andanyi nembaraŋa lao piya. ¹³Yulu dokomeoko pao namwa baa kapa ingingi lao suu pingi dupwa mendarele ingyuo parama. Dee Anatumya Ikinyingi dokona soo nyerami dokopa,

Koraisa baa akali angingyuo kareng dokona manda manjo namwa andanyi nembarsa pira. ¹⁴Dopa pyuo pirama ramo namwa wane kuki ingyuo wambu lapo yulu koon kendoruli ingyuo suu pingi kyai dokome namwa ukiaki minyilyasa panga soo nyilya nyana pyuo kararaminyipape namwa kao pele pele lao kareng dokona ingyua naramasa pira. ¹⁵Dopale ingyua napala namwa wambu yango mona maipala pii rolae lao kararama dokome namwana akali kyawa Koraisa dopale ingyuo andamanale. ¹⁶Baa kyawa dokona namwa banya kingi kimbu lengepe rangena panda dokona pyakuiyalya pyakuiyana piro kara napala kapa pela penge. Dokona namwa yongo mendaki ingilyamo dokome mende nyisalya nyisana pyuo poraiyuo piramano dokome yongo peparae mona retenge reng dokona simuisa ingyuo ando para ingilyamo.

Koraisa Keta Enenge Ingyuo Karalapape Letamo

¹⁷Kamongona kingi lao pii dake pyalana pyuo leto. Juu daa rara wakale see nao kareng dupwame kopetame suu pyao pyuo karaminyi dokona yulu dopale pii nalapape. ¹⁸Nakamba suu pingi iminjyamo karo, kamenge see nao pisipala mona kana pokwapala Anatupa rekya lao karaminyi. ¹⁹Langa papyuo kanda lyanolyano pyuo yulu koo yeelyo pinya wangu lakapala pingi.

²⁰Yulu dopale doko Koraisa keta siyamo kando nyii nayami kande. ²¹Nakama mana nyuo dokopa Yesu dokona kinyinya reng baa keta reng kuiyuo palenge doko siyami. ²²Yulu wambarae pinginyili pyuo, pyuo papyuo karo kanda lyanolyano pinya wangu lakao piyaminysa nakama kokwa sinyi nembeya doko ramanyi nembalapape. ²³Nakama mona suu pingipi alowa pyuo enenge ingyuo karalapape. ²⁴Kyakana reng Anatua makande minyuo rolae pyuo yapasi palamo dokona nyuo maralyalapape.^a

²⁵Dokona lao kyambo pii dupwa nembo Kurisene yango kando pii angi lao karamanale. Namwa yongo mendaki ingyuo pelyamo kande. ²⁶Imbu singi epeya kande dokopa koo angi doko ketae nyii nao dee imbu singi paleta piso yuu kguasinyi reta nao pipape. ²⁷Satane baa panda mai nalapape. ²⁸Waalii dupwa deeko waa nyii nana. Waa nyii nao rangena kingi dolapome yulu andake pyuo rolae pyuo karena. Yulu andake pipala kakana seramo dokona nyuo wambu bange aeyange dupwa maiyuo karara. ²⁹Pii koo dupwa nakamana kambunya neta nyii nao pii keyange yapo, pii keyange dupwa lao wambu yango nyisaraminyi dokopa serami dupwa elya pisi ingyuo parami. ³⁰Anatunya Imambu Poo Pyasi lekeleke koo rena lao pii nalapape. Anatumi yuu gii lumwa piramo dokopa nakama kiiramo nyeronya lao kongwalu palyuo Imambu Poo Pyasi

^a 4:24 Yango mendena koo dupwana suu pyani pyano kara nalapape. (4:32)

maralyinyi pyambuaya. ³¹Nakama ingi koo palyuo, imbu singi manjo, imbumi kumuo, pii porakai lao, mendali koo koo lengepe yulu dupwa rekya lao nembalapape. ³²Mendeme mende kando anjiki pyuo karo mona pau lao, Anatumi Koraisa keta nakamana koo dupwa kame sakaya dokona suu pyao nakamame yango mendena koo dupwana suu pyanyi pyano kara nalapape.

Yanga Paupau Lenge Dorena Karalapa Letamo

5 ¹Nakama Anatunya mona nyingi wane wanakepe ingyuo karaminyi dokona banya yulu pinginyili pyuo pyuo karalapape. ²Koraisa namwa mona reteyamo doko suu pyao yango mona reto karalapape. Baame mona retapala namwana lao kumuo maiyamopa rendamu kyaa keyange nyingi dopale Anatu nyiya.

³Nakama kanda lyanolyano pyuo enda bangepe nyipuli nyipuli lao pii dopale Anatunya wambu yapasimi lao kararami ingilyande daa. ⁴Mora pii koralepe kopyali piipi mee ketae giyalya giyana pyuo kapa laa napenge ingingi dupwana laa kaepala Anatu dokona sangyu lao karapengele ingilyamo. ⁵Pii dake kinyi lao suu pyalapape. Wambu kando lyanolyano pingipi suu pingi karo petengepe yanengena bange nyerami dokona iki wangu lakapala suu pyao karengape (doko Anatu kaepala bange wakale dupwa Anatu ingyuo panda maimisa pilyamo) dupwame nakama Koraisa Anatumana iso karengape panda dokona moyange nyii narami ingilyamo.

⁶Lapome epapala mee kambumi pii nupi soo larami dupwana waso karalapape. Koo dopale pyuo karo kamba letaminyi dupwa keta Anatumi kote lara ingilyamo. ⁷Dokona ingyuo nakamame nakamba role pyao kara nalapape. ⁸Nakama wamba iminjyamo dokona isa sulu sulu paeyo kareyaminyipape epapu Kurisene ingyapala Kamongona yanga paupau lenge dokona karaminyi. Dokona yanga paupau lengena wane wanakepe ingyuo karalapape. ⁹Yanga paupau lenge dokome yulu keyangepe yulu rolaepe yulu angipi nyuo andanyi pyambwarasa pira. ¹⁰Kamongome epe kandarali dupwa mana nyepala pyuo karalapape. ¹¹Iminjinginya yulu kalu kalu paeyo silyamo dupwana rekya lao karapala koo pilyaminyi dupwa nyuo pano serakamipape. ¹²(Nakamba yulu koo yalu pyuo pilyaminyi dupwa polo lakalana dokopa elya nyerama ingilyamo.) ¹³Bange peparae yanga paupau lenge panda seramo dokopa dopalendelamo lao angi panara. ¹⁴Panasi dupwa yanga paupau lasi dokona ingyuo para. Dokona lao pii dopa lao pyasi palamo.

Kumasi ingyuo luu palaminyi dupwa
 lenge rao sipuralapape dokopa
 Koraisame nakama keta neta ranyi pisinyale.

¹⁵Dokona nakama apa pyuo kararama lao kandokondali pyuo karalapape. Kopyali ingya napala wambu angi ingyuo paeyo karalapape.

¹⁶Epapu yuu gii koo epelyamo dokona mee kara napala yulu keyange pepenge dupwa pyuoko karalapape. ¹⁷Kopyali ingyuo kara nalapape. Kamongome nakama pimili lao suu pilyamo dupwana sepala pyuo karalapape.^b

¹⁸Waena ipwange langa andare nao kyawa sisingi bolombalo lanyi nembasara naa nalapape. Naa napala Imambu Poo Pyasi nyepala palyuo simbwaramopa karalapape. ¹⁹Nakama yango sukusa misi kenane dupwape Imambunya kenane dupwape pyao, Kamongo keta kenane dokome monarename piso nyuo ipwa kyukunaiye maiyuo pena lao pyao karalapape. ²⁰Namwana Kamongo Yesu Koraisana kingi lao Rakane Anatu dokona kaeya nao bange yulupi peparaena suu pyao sangyu lao karalapape.

Enda Akalipana Pii Palamo

²¹Koraisa wakasa dokona mona nembo wambu yango dolomana lungwa lungwarename ingyuo karalapape.

²²Nakamba enda dupwa Kamongo baa mupwa lao suu pyapala banya pii dupwa warombo soo petenge dokonako palyuo akalingi kando pipwape. ²³Koraisa baa Elyambu Pinginya mupwa ingyuo karamo doko suu pyao akali dupwa nakamana etenge dokona mupwa ingyuo karengi. Koraisa baa banya yango Elyambu Pingi doko Lete Wai Pyao Nyingi ingyaro karamo. ²⁴Elyambu Pingi doko Koraisana pii rape rape lao soo petenge doko suu pyao enda dupwa nakamana akalinginya yulu peparaena rape rape lao soo pyuo pisipape.

²⁵Yesu Koraisame Elyambu Pingi doko mona reto karapala reke lao kumuo paleya. Dokona ingyuo akali nakamana enda mona reto karalapape. ²⁶Koraisame Elyambu Pingi doko, banya pii keyangepe ipwapeme wate pyuo mondo lapala banya iki lao yapo nyiya. ²⁷Dopa pyuo Elyambu Pingi doko banya lenge kambu dorena rao kui kui lanyi pyambu, nyisi yaku nayape pisi nao, pepo kareta kiminju palyuo bwualyambwuana pyuo paa naramopa range nyero lao piya. ²⁸Nakama akali dupwa rangena yongo mona reto karaminyi dokonako ingyuo nakamana enda mona reto karalapape. Dokona lao mendeme enda mona reto karara ramo doko baa range mona retarasa pira. ²⁹⁻³⁰(Akali mendeme rangena yanenge awa naa nange. Rangena yanenge mondo lao elya pyuo karengi kandale. Namwa Koraisana yongo mendaki dokonakonde karamano dokona Koraisame Elyambu Pingi mondo lanyi pyambungi.) ³¹Dokona lao Anatumya pii pyasi doko, Akali dupwame nakamana endangi rakangepe yaki nyeraminypa enda dokopa pakao pisirambinyipa nakamba mendaki ingyuo para letamo. ³²Pii andake

^b 5:17 Bange yulupi peparaena suu pyao sangyu lao karalapape. (5:20)

yambe pyasi palamo doko Koraisapa dee Elyambu Pingi dokopana letamo lao suu pilyu. ³³Pii doko namwa wambu peparaeta keta lao palamo. Doko nakama akali pepara range mona reto karaminyi dokonako ingyuo nakamana enda mona reto karalapape. Dee enda dupwa nakama akalingi ketae pyambuo pisipape.

Wane Wanakepana Pii Palamo

6 ¹Nakama wane wanake dupwape Kamongo dokona lao endangi rakangepa laraminyili pyuo warombo soo pipape. Dopa pyuo pingi doko yulu rolae. ²Anatunya mawa pii lasi dupwana mende doko, Endangi rakangepa dolapo angingyuo karambinyi lao suu pyaro karalapape leya. Pii doko andake ingyuo mende pyakaramo dokona lao kaeyo leyasa piya. ³Dokona moko minyuo pirami ramo kapa palyuo isa yuunya gii andarele karare ingilyamo lao makande pyuo pyasi palamo.

⁴Endangi rakangepe dupwa nakamana wane wanakepe imbu singi nyakami nalapape. Mondo koo lao mana lamaiyuo Kamongona kingi lao ando pena larami.

Kendemande Banyan Isingi Akalipana Pii Palamo

⁵Kendemande akali dupwa nakamana yulu pyakamaingi akali dokona mona mendare palyuo inyimungu mona nembo Koraisana kingi dokona lao pyuo karalapape. ⁶Nakamame nakama kando kararami mange dokopa iki rae maimili lao pii nao, yulu pyuo dokopa Koraisana kendemande ingyuo Anatu pimili lao suu pilyamo doko monana manjo pipwape. ⁷Mee akalinya yanenge dokona pilyu lao suu pyao piraminde daa. Kamongo dokona lao yulu andanyi nembo pipape. ⁸Kendemande akali mee akalimipi yulu keyange pirami dokona Kamongo baame isingi manda manjo yano pyao kingi kiso jera lao suu pyao pipape.

⁹Nakama numi dupwame, nakamana kendemande dupwa kando mona mendaki dokona palyuo pipape. Pii porakai pyalana pyuo laa nalapape. Nakama nakambanape Kamongo yake panda kareng dokome koo epengepe dokona suu pyaa nao kareng doko suu pyalapape.^c

Yanda Pinya Anatunya Bange Wakyaro Kareng Doko

¹⁰Pii dake lao lumwa pyuo leto. Kamongopa pako karo banya porainya reng doko nyepala kulisa palyuo karalapape. ¹¹Anatunya yanda pingi bange dupwa nyuo maralyaro karalapape. Dokome imambu koo doko panga seramo dokopa porai ingyapala mee kararami. ¹²Namwa wambu yango sukusa dokona yanda pilyamande daa. Imambu koo malu yakena palenge dupwape mupwa dupwape iminjingi pandana numi dupwape

^c 6:9 Anatunya yanda pingi bange dupwa nyuo maralyaro karalapape. (6:11)

pipya yanda pilyamano. ¹³Dokona lao Anatunya yanda pingi peparae nyuo maralyapala yuu gii kwaeyaramo dokopa porayapala pyao pyalowa pyuo karo pao nenge rekya lapala kararami.

¹⁴Dokona ingyuo rapa rapa pipape. Marapu wapungi dokona kinyi kinyinya renge doko wapuo karo, romba kyangalipi dorena yulu rolae doko puu saneme komau wapusi porai pee pyuo karo. ¹⁵Manda rao nyingi waili pii keyange doko kimbu dokona pee piro karalapape. ¹⁶Anatu kapa ingingi lao suu pingi konambe doko nyepala ketaele alya minyuo koo pinginya walaka isare paleta dupwa kunjinyi nembo karare. ¹⁷Kyawa rarange kapame wasisi pyuo lete nyingi doko andu pipala, Imambunya wua gela Anatunya pii doko wakyaro karalapape. ¹⁸Imambumi renge kuiyuo yuu peparae kaeya nao atēja lalapape. Anatu dokona atēja peparae sokondali pyuo karalapape. Dokona lao lenge rao karo, Anatunya wambu yapasi peparae dokona kaeya nao atēja lakamailapape. ¹⁹Nakamame namba opetaeko atēja lakaraminyipa dokome namba waili pii keyange koko palenge dupwa pyongo pyaramopa kambu yaepapala eja nembo lao kararo. ²⁰Dokonako ingyuo namba waili pii lenge akali dokona puu maiminyi karo. Nakama atēja lakarami dokopa namba eja nembo mona kumapala lao karapili lao lalapape.

Poleme Lao Oto Dokona Yako Lao Leya

²¹Namba apa pyuo karo akinde pyuo karene lao Tikikasa namwana yangonge mona retenge Kamongona yulu rolae pingi akali dokomeoko peparae rolo langira. ²²Dokonako lao baa nakama karaminyi dokona pena leto. Namwa apa pyuo karaminyi dokona langyuo mona minyarambwako karara.

²³Yangonemoo Rakane Anatu Kamongo Yesu Koraisapana mona kyuu lao singi renegepe dee mona reto karo Anatu kapa ingingi lao suu pingi renegepe nakama keta palena leto. ²⁴Namwana Kamongo Yesu Koraisa dokona yaki nyii nao mona reto karaminyi wambu keta Anatunya mona palyuo ipingi renge doko palenale lao leto.